

me dit que vostre Capitaine, ny vous autres aussi, ne m'aimés pas; peut-estre ne sçaués vous pas que ie commande dés ma ieunesse, que ie suis nay pour commander, si tost que i'ouure la bouche, tout le monde m'écoute; aussi est-il vray que ie soustiens, & que ie conferue tout le païs pendant la vie de mes petits enfans, & de mes neveux, c'est ainsi qu'il nomme ses gens, les Hurons mesmes me presentent l'oreille, & ie commande parmy eux, ie les regle, comme estant Capitaine, ie ne dy mot ça bas, les autres parlent, mais il ne se fait rien que ce que i'ay dans la pensée; ie suis comme vn arbre, les hommes en font les branches, [29] ausquelles ie donne la vigueur: Voir vn homme tout nud, qui n'a ny chaussure aux pieds, ny autre habit qu'un méchant bout de peau, qui n'abrie que la moitié de son corps, disgracié de la nature n'ayant que la moitié de ses yeux, car il est borgne, sec cōme vn vieil arbre sans feuilles; voir, dis-je, vne squelette, ou plustost vn gueux, marcher en President, & parler en Roy, c'est voir l'orgueil & la superbe sous des haillons: Ce Thraïon, & vne partie de ses gens estans dans cette disposition, furent bien-tost aux prises avec nos Chrestiens, ils leur reprochoient que la foy & les prieres faisoient mourir les hommes; que depuis que quelques-vns s'estoient fait baptiser; que les maladies auoient regné parmy eux; & qu'à mesme temps qu'on leur a enseigné vne autre croyance que celle de leurs peres, à mesme temps la mort les a exterminés; qu'une partie de ceux qui se sont faits Chrestiens, s'entendent avec les François pour perdre tout le païs des Sauvages; ils apportent des exemples qu'ils croyent fort puissans: Vn tel, disoit-il, ayant deux femmes, & n'ay-